

Autor Sra. Digna Lacle-Herrera cu presentacion di tres buki awe den patio di "Arubianita"

ORANJESTAD (AAN) – Un evento hopi special lo tuma lugar awenochi, pa 7.30' or den e patio di Arubianita (seccion di Biblioteca Nacional) situa na Bachstraat 5.

Ta trata aki di e presentacion di tres buki di e autor sra. Digna Lacle-Herrera. Nan ta e Buki di poesia y storia, Buki di Pasco, y Haiku: "Den mi pensamiento".

Un programa atractivo lo tin den e evento aki, di cual sr. Frank Williams lo fungi como maestro di ceremonia (MC). Despues di e palabranan di bon bini na e publico, e lo haci presentacion di sra. Digna Lacle-Herrera y introduccion di e Buki di Pasco, for di cual e autora mes lo lesa un fragmento.

Lo sigui cu presentacion di sra. Maybelline Croes y su Coro TuttiFrutti cu seis cancion skirbi pa sra. Digna Lacle ademas di un sketch titula "Un regalito pa e Niño".

Despues lo tin introduccion di e "Buki di poesia y storia". Sra. Belen Kock-Marchena ta lesa un storia for di e buki aki. Ta bin despues un presentacion di Edgar Kelkboom acompaña pa su conhunto musical. Seguidamente, sra. Belen lo declama un poesia di sra. Digna Lacle-Herrera. Despues MC lo duna un splicacion di Haiku y e autora ta lesa algun haiku. E autor lo entrega algun ehemplar di su bukinan na diferente persona, locual sigur lo ta un gran honor pa esnan cu lo ricibi e regalo aki.

Pa conclui e evento sr. Edgar Kelkboom lo interpreta algun pieza musical na harpa acompaña pa su grupo. Pa cera cu broche di oro, lo tin un brindis y e posibilidad ta keda habri pa cumpra buki.